

全
浙
詩
話

全浙詩話卷三十五

會稽陶元藻篁村輯

男

廷珍

編次

仁和朱文藻映潛

參訂

同邑宗聖垣芥颿

明

沈木

木字子喬嘉興人萬歷間縣學生有近竹稟

明詩綜

子喬自號靜德逸人夜起一詩具臻佳境

按夜起云暑夜不成寐起步中庭中殘月忽墮水明河猶在空籬根滴清露樹杪生微風坐愛新涼好先

秋有候蟲清微淡
遠在韋孟之間

米雲卿

雲卿字君夢自號樗林居士金華人萬歷中妖
書禍起雲卿叩闕上言事乃寢名重公卿

樗李詩繫 樗林居士終老吳興山中著有山居草二
刻其秋柳落花諸律尤膾炙人口秋柳詩金陵人多傳
寫之又有撥悶詩云十年湖上社雙屐柳東山有子癡
難教無家老不還亦可見其老懷也

鍾祖保

祖保字念之號方壺山人又號孺西晚稱空慧

子嘉興人貢生

橋李詩繁 方壺山人鍾祖保博學能文其兄秉文蓄
一鸚鵡晨昏念佛必應聲相和及秉文捐館鸚鵡自籠
中躍出大鳴叫者三遂却食死又有夾竹桃一株秉文
甚愛之至是亦枯死祖保有二絕云幾年鸞養喚聲頻
燕卽攜來到海濱一自主人乘鶴去羞將言語向他人
露井仙桃別樣花枝枝濃艷吐奇葩忽然凋萎非無意
怕到尋常百姓家

卜世臣

世臣字長公號蘭史秀水人萬歷間文學

櫟李詩繫 卜世臣字長公號蘭史秀水人萬歷間文學有詩未刻而歿自題云正平簡傲乏人知此日并無大小兒鴻寶著成誰鑒賞好鑱禹穴葬吾詩又歲月蒼茫事轉非欲逃海上築漁磯獨留艷句三千首尚有精光燭少微亦自負甚矣

李 遵

遵字于鴻鄞人以進士歷監察御史爲陝西按察僉事

甬上耆舊詩叙傳 侍御李公遵初開園本楊氏舊址有作絕句曰楊花落盡李花開李花開後復誰來公聞

之欣然卽名曰來誰園其達懷如此及公歿十餘年園
盡廢衰草彌望至今尚無來者

黃 恕

恕字存道一字自虛號虛齋臨海人

三台詩錄 虛齋於作詩之外無他事惜稿多散佚惟
傳口占絕句一章云南山雨霽水花靜一曲滄浪歌獨
領此意何人可共知信天翁立波光冷

吳稼澄

稼澄字翁晉孝豐人維嶽子以例除南光祿典
簿累遷雲南通判有元蓋副草及北征南諸滇

游諸稿

靜志居詩話 公翁晉樂府如佳兒騎駿馬左右馳突靡
不如意近體頗合西崑歸自滇南里居極絲竹雲林之
趣自號大滌先生病革語其子以布衣幅巾斂謂如此
庶足以見疇昔詩人於地下蓋以貲郎自懲云

李瑋

瑋字偉卿私諡三橋詩叟勤人布衣所著詩文
有桑麻集

甬上耆舊詩 讀其集五言古詩風采華妙力能高步
古人七言歌行亦不失建藩要俱絕去陳言思以所作

易一世靡靡之習返諸先民年近百歲此志尚不衰斯
其人可謂邈然千載矣

陳民俊

民俊字公顓鄞人初爲諸生後中武進士官陝
西都司

甬上耆舊詩 吾鄉有湖在城中曰日月湖湖上七橋
柳汀花嶼諸大家樓榭俱在其中公顓嘗作湖上竹枝
詞爲里中所傳今風景雖不可復見每讀其詩輒低徊
久之

按其竹枝詞云水雲亭子四宜樓樓外烟波亭外舟
官府讌賓游不得輕撓移泛蓼花洲又撈花名處自

何年陸渾山莊勝輞川隔岸垂楊堪坐釣水憲長繫
孝廉船固流利可誦然尚不如其晚宿廢刹云十里
松聲沈野寺萬峯寒色落山門憩蓮花庵云
池蓮霜早無全葉籬菊林殘有剩花更佳

張嘉慶

嘉慶字開祖號東閒鄞人國學生

甬上耆舊詩 東閒白齋先生子也少有才自負既長
入太學益肆志於詩大司馬張公目爲豪士余嘗讀白
齋絕句有示慶一首曰吾兒才高須矜括官樣文章不
在奇人道笋高能過母丁寧養護鳳凰枝卽其父亦奇
之矣

萬表

表字民望其先定遠人以開國勛世爲寧波令
指揮僉事遂爲鄞人年方十七襲職中武舉第
一會試對策置第十八名仕至都督僉書南京
中府最後推爲浙直海防總兵辭不起

靜志居詩話 顧元言云鹿園才清思逸稟履高曠詩
如空巖曲瀨宛轉寥曠時復滴瀝得幽閒真趣五言有
韋應物深致七言氣骨稍弱

宋 旭

旭字初暘嘉興人

簪雲樓雜記 石門山人字初暘工山水古法魯題鴈

宕圖云沙門文石自鴈宕歸言未至龍湫初過老僧巖
入松徑數里卽石橋寺寺以洞爲殿深可五十武其高
廣倍之左有方池石罈泉下如注甚清冽石橋高可十
丈以之爲山門各門之下壘石爲臺俯可六七丈旁通
石級從左上小門藤蘿掩映幽絕可愛疑非人間世也
余初未信文石遂援筆作圖爲此乃爲潤色之并賦一
絕云禪客探奇千里遊石橋寺裏正逢秋深松路僻人
烟少惟有老泉不斷流萬歷丁丑中秋攜李宋旭題
吳越所見書畫錄 宋石門蒼潤軒圖立軸攜李宋旭
畫并題贈仲交學士詩云清閼何年閣幽棲最可憐林

篁疎着雨庭草濕凝烟畫逸倪元鎮詩清孟浩然吾生
一何幸長得侍高賢

孫華

華字元實永嘉人

華亭縣志 華僑居華亭郡守課諸生春陰詩操筆立
就落句云柳花只在斜陽外不肯分明過小橋守大奇
之誦經考史以博雅聞尤好岐黃家用薦爲醫學教授
辭免戴折角巾衣鶴氅衣望山臨水步屨翛然所居小
閣列古彝鼎法書名畫焚香靜坐終日書非佳墨熟紙
不作飲饌非精潔不食士非賢不與交卒年八十餘

康從理

從理字裕卿永嘉人

靜志居詩話 從理任俠好談兵間關戎幕劉子高建
纛毘陵病革從理馳赴與訣經紀其喪扶其柩至武林
遠近義之居燕偕黎惟敬游西山其倡和詩尚存餘多
散佚太倉曹子彥収而刻之曰二鴈山人集

徐蘭

蘭字與善開化人

沐雲詩話 夏竦天台道中詩云雲間忽見寺山盡偶
逢人讀者嘆其幽靜至徐蘭絕句云天台三十六重霞

中有仙人五百家我到家家卹釀熟滿城開遍碧桃花
自見包括新艷

項元淇

元淇字子瞻秀水人

萬歷嘉興府志 子瞻狷介寡儔不事家人生產於書
無所不窺工詩詞尤好臨摹古法書善草聖每遊戲翰
墨尺幅數行人競寶之嘗以貲拜上林丞非其好也遭
內艱歸墓田丙舍卒歲食貧親知貴顯或厚遺之却弗
受時與騷人衲子往來唱和談名理超超元著季弟元
沐博物好古尤精繪事家藏丹青墨跡意得輒臨摹題

詠其間自號墨林山人

金九成

九成字伯韶嘉興人

弇州四部稿 九成幼警敏善屬文九歲題詩郡齋爲
郡守龔勉所器重年十二補弟子員萬歷丙子舉於鄉
再上春官失利歸卧武原望虞山著史論史辨各三十
卷又別爲元史考誤四十卷詩格在高李迪袁景文之
間五言今體尤爲適上

劉世教

世教字少彝海鹽人

海鹽縣圖經 世教於詩好李杜嘗取舊集之編年者
分體次之序以行世自爲詩尤秀出文仿六朝儷體其
所善卽文通子山不讓也兼之工行草尺牘有集十二
卷

卓明卿

明卿字徵甫仁和人

兩浙名賢錄 明卿眉目如畫始薄章句竊與豪子弟
學騎射劍術已乃折節閉門博綜百氏所交傾海內豪
傑苟失一名下士卽恥之士或不爲明卿知亦轉相輕
誚好稱詩爲國子生賦桃溪書屋詩詩聲滿留都謁選

銓光祿稱詩長安市中父艱報闕補珍饈署正有卓氏
藻林唐詩類苑文集續集北游稿行於世

余堯臣

堯臣字唐卿永嘉人有采邁集

靜志居詩話 高季迪夜飲余左司宅云燈銷月窺闌
角警霜委砌答余左司沈別駕元夕會飲城南詩云故
人念我有二子省內郎官府中佐徐幼文采邁詩題爲
永嘉余唐卿左司賦然則左司之稱本於越鎮將版授
而司馬之銜疑唐卿曾仕於淮張也

注 樞

樞字伯機勤人

靜志居詩話 伯機生世祿之家不樂仕進治別業曰

泡園賦園居詩六十首閩人徐興公亟稱之有存俟篇

沈明臣

明臣字嘉則勤人有豐對樓集

靜志居詩話 嘉則沈明臣文長徐渭同在胡少保宗

憲幕府並受知遇督府周防嚴密文長恆戴敝烏巾衣

白布漣衣非時闢入或昵飲夜深猶開戟戶以待嘉則

獄獄不阿少保遙望見必起立嘗譙將士於爛柯山酒

酣樂作嘉則於席上賦凱歌十章吟至狹巷短兵相接

處殺人如草不聞聲少保起捋其鬚曰何物沈郎雄快
乃爾命刻石置山上嘉隆間士大夫以篇什相尚最
繁富者莫若弇州於時吳明卿之甌齔洞汪伯玉之太
函李本寧之大泌山房諸集以及劉子成馮元成余仲
房屠緯真之徒糟邱肉林愈多愈穢下及布衣如王承
父王百穀輩咸以多相尚嘉則先後積詩七千餘夫安
得精然絜之承父則雖饒腐菌間有神芝卽屬芻芻不
無嘉蕙非若諸君之叢箐荒茆紛然彌望也

按嘉則自田間負異才喜讀書尚廓落大節慕謝安
王侯之爲人少保胡宗憲辟致浙東名士二人於幕
下一爲山陰徐渭一爲嘉則在幕中嶽嶽不少阿誰
少保亦雅憚之遙望見卽爲離席饒歌十章世僅傳

其一其全首云銜枚夜度五千兵密領軍符號令明
狹巷短兵相接處殺人如草不聞聲然其生平奇句
頗多如雲間雨泊云暗風驚死燭黑月暗無天留別
社中諸友云山川知姓氏天地借文章荒邨云水痕
殘半壁秋色閉雙門渡峽江云江渾諸水聚雲雜亂
山低皆有新警之意蓋其詩諸體皆擅長而七古五
律尤妙自胡宗憲死後遂淪落湖海間益跌宕自放
過太倉一通謂弇州高坐論詩氣直凌其上弇州雖
陽許爲布衣之傑實心憚之後曹能始石倉詩選錄
豐對樓集最多稱詞苑第一豐對樓者嘉則娛老著
書處也其所爲傳序碑記等相傳爲原本班馬敘事
有法屠長卿亦曰先生文疎宕有奇氣生平理偉大
節不媿其爲文其遺文四百篇
聞餘姚邵氏面水軒尚有鈔本
文藻按錢塘黃樹穀松石先生家藏沈嘉則寒塘藕
詩真蹟云寒塘藕高壤深山無處有冰谿雪壑天地
藏一片何由入姑口吳家婦口口聲聲應姑有求之
不得心欲焚泣拜求天唯稽首妾不惜所龜手妾不
惜泥汚肘願乞寒塘玉一枝持餉吾夫堂上母忽聞
空中言指向寒塘右掘地三尺深得藕真非偶療姑

疾姑百壽孝婦之名垂不朽姜詩之水孟宗竹王祥
冰鯉雷藤酒一念精誠神鬼知事非理外幾當剖莫
道古人能莫道今人不君不見吳家婦寒塘藕
此詩爲吳孝婦而作事尤足傳非僅詩工而已

呂時臣

時臣字中甫鄞人有甬東山人集

甬東山人集序 中父稱詩尤於沈明臣避仇游歷齊

梁燕趙間旅寓章邱與李伯華論詩遂大進至青州客

衡藩衡莊王愛其詩爲刻甬東野人稿晚客藩藩禮之

亞於謝榛卒於河南涉縣魯王孫中立序其詩曰山人

鶴骨清癯若出衣表貞介廉潔不妄交不苟取特爲諸

侯所重

靜志居詩話 中甫以避仇客歷下與李中麓楊夢山
切劘酬和既轉客青州衡莊王邸起高樓東向眺遠樓
成王於望後四日置酒召客時日景既盡疎星尚微王
來肅客坐憑欄語笑已而月上王懽甚因命曰待月樓
請客賦詩中甫詩云川原夕氣交暝色自相向月猶藏
海底人已坐樓上王賞擊謂得待字之義手觴奉之俾
居客右

朱應龍

應龍字舜夔一字近臣鄞人有東籬樂府

靜志居詩話 東籬與沈明臣葉太叔盧雲齊名號明

州四傑乘月飲酒海上大醉溺死其短歌行云皎皎月
明篤言宵征唯君之故不遑自寧說者以爲近於讖也

范 汭

汭字東生烏程人有范東生集

靜志居詩話 東生詩才嫺雅如靈犀結佩可以辟塵
方之孟陽允兆諸君覺尤騰拔

洪鼎臣

沐雲詩話 鄭良璧詩湖海壯懷雙黑鬢古今浮夢幾
黃梁秦華峯詩云漫倚壯懷歌伏櫪且從榆景賦閒居
蔡宗堯詩云湖海壯心驚白首廟堂清議奈烏紗共是

立志著意不同至洪鼎臣詩云十年鬢向西陵改一寸
腸隨北斗迴論者謂又是變徵之聲

徐渭

渭字文清更字文長山陰人諸生有櫻桃館集
朱衡嶽集文長九歲能屬文年十餘傲揚雄解嘲作
釋毀爲諸生胡宗憲督浙江招管書記時方獲白鹿海
上用渭表以獻上大嘉悅其文宗憲以是益重之時督
府勢嚴重文武將吏庭見無敢仰視者而渭敝巾澣衣
直入無忌宗憲常優容之渭亦矯節自好無所顧請及
宗憲被逮渭慮禍及遂發狂疾繫獄中以言者力獲免

及老貧甚鬻文自給人操金請詩文書繪者值其稍裕
卽百方不得遇窘時乃肯爲之渭嘗言吾書第一詩二
文三畫四識者許之 邨中偶與袁中郎談詩其攻王
李頗極口而詈于麟尤苦予偶舉李華山詩袁卽曰北
極風烟還郡國中原日月自樓臺如此胡說當與兵馬
司決譬十下予曰王上句黃河忽墮三峯下一句自好
但對稍未稱耳袁微頷亦以爲然偶案上乃其新詩稿
持問予曰此僕近作何語爲佳予拈其聞蟬二句云琴
裏高山調詩中瘦島吟最工并其鄴中懷古一聯云殘
粉迎新帝妖魂逐小郎用事鎔化前人未有但結聯曹

家兄弟好無乃太淫荒忽講道理近於呆腐袁笑謂予
賞音但渠所最推尊爲吾浙徐文長似譽之太過抽架
上徐集指一律詩云三五沈魚陪治俠清明石馬卧侯
王謂予曰如此奇快語弇州一生所無予甚不然之曰
此等語有何佳處且想頭亦欠超異似非文長得意語
袁苦爭以爲妙絕則予不辯

居易錄 予少喜徐渭詩句椎牛千嶂外騎象百蠻中
昔使蜀有詩三百餘篇凡四押蠻字云秋河落百蠻飛
鳥入南蠻江山真萬里雨雪到諸蠻客心爭歲暮猶自
滯烏蠻及使粵又有句云鬢從五嶺白山入百蠻青後

有談者未知可追踪文長否耳

靜志居詩話

文長詩原本長吉間雜宋元流派所謂

斐然成章不知所以裁之者其自評云吾書第一詩二
文三畫四然詩文未免繁蕪不若畫品小塗大抹俱高
古也 徐文長逸稟有詩云南海大夫歐泉州處士尤
泥中雙綠鬢詩伴兩蒼頭自注云尤山人侍者范鹿能
詩不減歐楨伯之僕惜其稿不傳也

按渭爲少保胡宗憲器重遂相得甚旣而宗憲被逮
門下客皆避匿渭聞行至京口上謁時論者多言宗
憲冒功侵餉渭爲條析端委宗憲用其言竟得釋初
少保之指文長也適文長居憂在里謂使者曰吾有
父母喪不能爲王公易服許衰經相見當卽赴轅不
則未能從命也使若以告少保愛其才如所請時少

保威重兩浙文長竟縞服麻鞋躡階而上軍吏莫不
錯愕其生平傲誕類如此讀書處手植青藤一本枝
幹盤鬱綠葉陰濃心甚愛之歿後百數十年藤枯而
復生者凡數次至今猶存其地雖屢易其主尚稱青
藤書屋題

詠亦甚多

又按余嘗見文長遺像一幅小僅盈尺方圓廣額白
皙秀朗通體肥大戴烏巾衣廣袖白袍斜坐鹿皮褥
際之上旁侍立一子枳歟枚歟亦無由知之其自題
贊語云骨法重軀軀似白便便經史一百冊須積風起
大翼最晚明歲此時得子能和在陰鳴復似兩鶴不
作鵬下有天池漱山渭五字又一行寫萬歷乙亥中
秋繪者沈樵仙也十二字書法固佳畫筆亦簡老無
枝葉每觀其生平書畫與詩皆縱達不羈竊擬其品
貌必岐嶠奇古今不圖溫潤乃爾且如此豐腴閑逸
宜多福澤而落拓終身死尤淒慘則更不可解也此
像今藏於

蕭山王氏

孫揚

揚字世顯東陽人自號石臺畸人有課餘憂餘

休餘諸稿

金華詩錄 孫揚父母吟評蓼莪一篇寫父母之恩已
無剩義此作衍爲八百四十字絮語瑣言至情實理拉
拉雜雜中一片真意團結以之發聾聵瞶亦有助於風
雅

尤嘉

嘉字子嘉嘉興人有西陵集

靜志居詩話 子嘉亦趙康王客穆敬甫錄其詩以比
謝四溟句如偶因看竹來僧院不爲求魚坐釣磯頗有

自適之趣

陸光宙

光宙字與嘗平湖人有鉏餘稿

靜志居詩話 與嘗隱居郊園與宗旭初暘璩之璞君
取輩一十八人結文酒之社晚夢一道士持陶靖節小
像索題諦視之卽己也題云在晉爲淵明躬耕辭五斗
昔以節自持今惟義自守千載復歸來春風吹五柳曾
識白蓮人遠公是吾友蓋十八人中有白蓮道人如本
也

黃承昊

承昊字履素秀水人萬歷丙辰進士官至福建
按察使有閭齋吟稿

明詩綜 陳仲醇云閭齋詩高華而不傷氣幽微而不
損神流便而不降格李君實云閭齋風華婉麗詩品在
開元大歷間其過長溝見荷花云雲山渺渺水悠悠香
滿長堤物外秋只少若邪溪上女乘潮一弄采蓮舟塞
上曲云鄉月多情伴我來沙場相對不勝哀來朝生死
知何處且解征袍醉一回

黃承惠

承惠字元孚錢塘人

居士傳

引憨山夢遊集

黃元孚名承惠浙江錢塘人爲人耿

介不合俗不能治生產事大母盡孝好施與隣人寒無衣者解衣衣之無食者傾其囊中錢與之妻弟聞子與奇其清苦導往雲棲宏公所以弟子禮見宏公名之曰淨明受沙彌戒屏家屬念佛號默然轉蓮華經七日家人皆聞蓮華香忽微笑說偈曰一物不將來一物不將去高山頂上一輪秋此是本來真實意歡然而逝

李元昭

元昭字用晦號岫樓山人錢塘人有岫樓山人

集

湖山詩選

李用晦西湖社成集來鵲樓詩云西湖清

且淺中有蘭與蕙烟霧變晦明鱗蟲潛水裔飛構冒層
阜仙筵敞平漘野饌何芳鮮烹調狎甘脆翩躚麟鳳臻
適遇風雲際簪佩曜華宿觴酌論文藝社以白蓮申盟
以青松誓莫謂傾蓋新山林置遺契

西湖志

岫嶠山房錢塘縣志在靈隱明李元昭用晦

構廬於慎菴之址山房數楹架迴溪絕壑之上溪聲出
閣下高厓插天古木蓊蔚山人好詩與天池徐渭友善
所著有岫嶠山人集元昭自作岫嶠山房客至留飲詩
云峯巒開霽景洞壑歛春陰蝶粉霑花面蛛絲繫草心

青霞飛醉盞白雪泛鳴琴且盡山陽賞無勞問解簪

李 竣

竣字公起鄞縣人

炙硯瑣談 侯官曹能始撰二異人傳一華亭唐仲言

詢汝失明一鄞縣李公起 竣耳聾口啞均能勤於箋述不

廢吟咏洵人所難仲言夜別陸長倩云悵別高樓酒易

醒坐間落葉滿沙汀春來儻憶同遊地無限垂楊夢裏

青留別沈茂之云風雅翩翩自不羣榮華入目總浮雲

江湖此去無知己早晚移家欲就君公起山陰晚泊云

落日山陰道孤舟帶遠汀秋林紅葉重夕浦黑風腥客

夢碣前斷漁歌鏡裏聽來朝餘興在何處訪蘭亭當鍾
譚盛行之時而皜然不滓尤奇傑士也

黃茂梧

茂梧字東生汝亨長子錢塘諸生

卧月軒稿錄

寓庸公書壙中石曰茂梧余長子眉目

踈秀受書能讀而氣殘弱不任讀十九歲補錢塘博士
弟子員丁巳病心胃不解戊午扶病強入試喘喘望棘
院太息不得入病彌甚矣己未二月卒婦顧氏慧哲曉
文理子二燦燁余先世越人自洪武初占仁和匠氏籍
稿中附載西溪落梅詩云短棹隨飛鷗引我西溪曲溪

路何濚迂古梅映深竹二月雪始晴春風吹簌簌翠嶂落寒香相對眉髮綠日暮憺忘歸抱影和雲宿

鄭龍采

龍采字聖昭歸安人天啟辛酉舉人知婺州縣有高密堂詩

靜志居詩話 聖昭雅尚清狂與烏程丁永鑑同舉於鄉酒分詩情最相親暱丁有爲山閣詩大都北里冶遊之作聖昭牽絲入黔謁楚撫何公騰蛟公欲留爲監紀辭曰朝廷命某宰婺州不命參公軍事也及解組過楚何已殉難旣歸祝髮入卞山不復與聞世事句如長江

無六月驟雨不終朝明月幾時上歸雲未得閒花飛晴
見雪竹密晝垂陰殘雪重重白歸鴉陣陣圓暗泉蒙澗
草驚鳥落山花寺隨人意改身到上方閒戍荒遲夜柝
人定話歸潮非蹈襲者所及

朱治憫

治憫字子暇嘉興人天啟辛酉舉人通判肇慶
靜志居詩話 子暇宣勞戎務一星卒殞天南生爲進
表之劉焜死作思歸之溫序其詩不沿時習磊落欽崎
至賣宅一律悽惻纏綿菴蔬之草心實傷已得家報知
做廬已賣歎云拮据經吾手書來已屬人一身猶長物

四壁委微塵歌哭今無地琴尊別有隣庭梅應爲我望
絕嶺南春

張國維

國維字其四東陽人天啟壬戌進士累官至兵
部尚書坐劾下獄崇禎十七年春起原官督餉
直浙後死於難

金華詩錄 玉筍死節時作絕命詞三章其一自述云
艱難百戰戴吾君壁壘東南氣厲雲死去仍爲朱氏鬼
精靈常伴孝陵墳其二念母云一暝纖塵不挂胸惟哀
萱母暮途窮仁人錫類能無意今古由來孝治同其三

訓子云夙訓詩書暫鼓征而今絕口莫談兵蒼蒼若肯
施存卹秉耒全身得所生此其取義存仁之大者不當
以詩論也附存於此所著有三吳水利全書大有關於
東南民感其德立祠虎邱又有姪孫承焜玉笥剩稿跋
畧云將赴義太夫人語之曰兒固當報國會須別我有
頃至衣冠言動儼若尋常猶意其未死而不知赴水踰
時矣心懷罔極沒尚依依循咳草一帖皆思太夫人作
也自逮獄釋用以暨巡漕勦征未獲朝夕在側見之於
詩烏鳥私情有累幅難罄者不特赴義之從容授命也

和彪佳

彪佳字幼文山陰人天啟壬戌進士除興化府
推官入爲福建道御史巡按蘇松改南京畿道
以大理寺丞轉巡撫應天都御史謝病歸乙酉
閏月自投寓園池中死

靜志居詩話 祁公美風采夫人商亦有令儀閨門倡
隨鄉黨有金童玉女之目嘗治別墅於寓山極林壑之
勝乙酉閏月六日坐園中題其案曰圖功爲其難潔身
爲其易吾爲其易者聊存潔身志含笑入九原浩然留
天地夜至放生碣下投水死

按忠愍爲人器量識見迥非凡近可及當時劉澤清
擁重兵鎮守淮揚驕橫日甚一日以書招忠愍有愛

公者恐澤清跋扈以論不合將兵威脅公勸公勿往
公曰吾不行是示之怯也卽日就道澤清處亦疑公
不來舟至京口順風揚帆頃刻抵瓜州澤清軍門大
驚入告曰祁都堂至矣公入座大飲論勤王恢復事
侃侃無稍避言畢出登舟而歸頗似謝安赴桓溫新
亭之譙也其殉難時在乙酉五月貝勒聘至公自平
水檣櫓至寓山赴水而死子理孫擎舟求之柳陌下
正襟危坐水僅及額冠履不動面帶笑容腹無勺水
時人異之一云乙酉閏六月六日以詩題案畢又書
曰已治棺寄戴山戒珠寺可取以殮我是夜兄子鴻
孫侍側夜分不寐公第曰君子之愛人也以德速鴻
孫倦隱几步至放生碣下投水味旦猶整巾帶立水
中

祁豸佳

豸佳字止祥號雪瓢山陰人天啟丁卯舉人以
教諭遷吏部司務明亡不仕守祖父卹龍賣畫

代耕垂數十年以壽終

柳亭詩話 青山白社夢歸時可但前身是畫師記得
西泠風雨後真堪圖取大蘇詩此祁止祥先生遺墨偶
檢敝篋得之人但知先生以書畫擅名而不知其吟咏
有過人者存此以見吉光片羽云止祥忠愍公弟也毛
大可曰忠愍公以大節自見闔門內外悉隔絕人事以
吟咏寄志侍妾家婢無不能詩真盛事也

按止祥自舉鄉後不遇於春官者數次心常怏怏因
自爲新劇按紅牙教諸童子或自度曲或令客度曲
自倚洞簫和之借以抒其憤懣不平之氣曹顧菴稱
其書不在董文敏下畫入荆關之室詩文填詞皆有
致周櫟園謂其能歌能奕能圖章以至奕錢蹴鞠之
戲無不各盡其致以名孝廉隱於梅市蓋異人也嘗

題凌又蕙畫五絕一首云空山鬱蒙茸
長松出林表所以蔣山徑無人亦自好

倪元璐

元璐字汝玉號鴻寶上虞人天啟壬戌進士改
庶吉士授編修歷侍講南國子司業右中允左
諭德右庶子國子祭酒升兵部左侍郎進戶部
尚書兼禮部尚書翰林院學士京師陷自縊死
初諡文正改諡文貞有憶草

靜志居詩話 歷日之頒明太祖定於九月之朔其後
改十一月朔繼又改十月朔遂爲定制是日帝御殿比
於大朝會士民拜於庭者例俱得賜倪尚書天啟中賦

頌歷詩最爲典重他詩過於新奇不然也

柳亭詩話 明末詩文之弊以雕琢小巧爲工篠簞騰
犢之類萬口一聲吾鄉先正如倪文正鴻寶王文節季
重皆名重一時代言文飯有識者所共見矣至其詩若
倪之曲有公無渡藥難王不留王之買天應較尺餘月
不論錢歇後市語信手拈來直謂之遊戲三昧可耳

按文貞殉節觀諸書所載不同一云京城陷整冠帶
北向謝闕南向謝母出就廳事題案云死吾分也愼
勿棺衾以誌吾痛遂投環死一云城破攜斗酒赴關
壯繆廟對神而飲飲畢仰嘆曰今日不死吾何面目
見此公哉卽縊於廟中二說未知孰是文貞工
書筆力矯健其行草大字全於蟠結處見精神

王思任

思任字季重山陰人萬歷乙未進士知興平當
塗青浦三縣遷袁州推官歷南京刑部主事九
江僉事有避園擬存虞山詠

藝苑名言 于少保祠王季重有句云社稷留還我頭
顱擲與君語頗激壯

西湖志 南屏淨慈寺吳越時建宋孝宗朝僧顥募修
寺之華麗軒壯無踰此者王季重云淨寺何年出西湖
長翠微佛雄香較細雲飽綠交肥巖竹支僧閣泉花蹴
客衣酒家蓮葉外鷗鷺往來飛

按遂東工瘞業與家文簡公齊名一時有王山陰陶
會稽之稱遂東有錢癖見錢卽喜形於色昇日爲文

特佳然其所入者強半皆諛墓余又好施而不吝或散給姻族或譙會朋友可頃刻立盡與晉人持籌燭下溺於阿堵者不同故世無鄙之者聞莊烈之變卽放浪不羈遁跡秦望山數載而卒有討馬士英檄爲人傳誦其一腔忠義之氣不在文貞下後世僅以能文日之失之遠矣

龔士驤

士驤字季良義烏人崇正戊辰進士漂水知縣金華詩錄 季良詩文不傳載於藝書者七律十四首五律四首七言絕五首五言絕六首卽其中甄錄之藝書稱其詩精苦沈細在唐人中不多見嘗自謂降格爭奇亦有元勝不必開歷便足登峯起結往往微遜亦自知之而不肯措意改作故多以句勝七言如鳥外斷虹

山寺雨浦邊斜燕石橋風斜合燒烟臨渚暗對分寒雨
過江秋古癖暗銷江燕雨酒悲寒灑夕陽花秋草洲寒
鸚鵡筆江楓夢冷孝廉船嵐結晝陰風定後柳凋秋影
葉稀初炊烟隱樹遠村暮暝色渡江春浪深低分密雨
連青嶂散落疎鐘就白雲樹發寒花紅帶葉峯回霜雁
白翻雲孤枕幾年愁暮笛一燈初夜隔春紗袖錦夜寒
湘女瑟襪羅秋冷石家塵愁中草色偏嫌雨夢裏花枝
獨背春花晴尚帶數枝雨林靜時驚一夜風馬馳玉埒
輕銜雪鳥避金丸散入雲風急浦帆爭截浪春歸鳥夜
續啼花踈砧萬點浮寒水霜鳥千羣急夜風五言如秋

嶂宜寒月春林足緒風逕回泉引客屐緩鳥催人燕頤
差池雨花標次第春綠柔嫌霧重紅密怨春奢芳樹和
風綠幽蘿逼雨青折簡迴車少開門拒客多樹納初晴
日花爭欲盡春戎旗銜雁雪獵火仗鷹風雨來風點石
雲細月生巖上者神秀雄渾次者幽婉眇麗皆一代之
逸唱也

全浙詩話卷三十五終

全浙詩話卷三十六

會稽陶元藻篁村輯

男

廷珍

編次

廷琬

仁和朱文藻映潛

參訂

同邑宗聖垣芥颿

明

周鳳翔

鳳翔字儀伯山陰人崇正戊辰進士改庶吉士授編修累遷翰林院侍讀都城陷自經死贈禮部右侍郎初諡文節定諡文介有集

靜志居詩話 甲申三月之變文介授命獨遲十九日
城陷語吳莊介云臣子義在必死然必一視大行殯宮
縞素慟哭方可無憾爾二十一日赴東華門茶棚下舉
哀復匍匐至邸自經絕命詩云碧血九原依聖主白頭
二老哭忠魂時親猶具慶也

劉振之

振之字而強慈溪人崇正庚午舉人署東陽教
諭遷鄢陵知縣城陷不屈死贈太僕寺卿有畫
溪近稿冰壺先生遺稿

金華詩錄 鄢陵破李賊逼之降不屈索筆題云放鶴

鶴情超呼龍龍性在一朝還太虛游神天地外遂閉目不食賊怒褫衣冠凍雪中罵不絕口而死

胡珙

珙字伯瑩太平人有霞石稿

三台詩話 伯瑩佳句如烟消極浦身如葉寒集疎林露作花人競傳之

潘集

集字子翔會稽人

康熙己亥紹興府志 集與王毓著同事戡山南北變後聞毓著沈柳橋死大慟操文祭告旋書一紙几上曰

昔年東渡今復渡東水與月俱白吾骨亦不黑出五雲
門渡東橋袖石沈死時年二十八次日出之手持一筵
畫松於上有有石方爲米無松不是潘之句

徐之瑞

之瑞字蘭生臨安人崇正丙子舉人有橫秋堂
稿

靜志居詩話 徐之瑞字蘭生臨安人五言古致紛披
近體倣韓冬郎尤極綺麗

萬泰

泰字履安鄞人崇正丙子舉人有寒松齋稿

靜志居詩話 履安鈞黨顧厨士林圭臬兵後以經史
分授諸子名一家其最著者斯大充宗斯同季野也詩
多清商變徵之音羊城旅懷等作見者十手傳鈔其云
廣柳車中容季布湘江澤畔問巫陽舟經彭澤竟客死
舟中識者以爲識云

續甬上耆舊詩 萬履安學者稱爲悔菴先生高鼓峯
曰先生粵草六十首寄余詩曰愁心欲寄桐齋客怕折
江梅十月花晦木以爲不祥

謝朝鑣

朝璞字韞待太平人

三台詩錄 韞待嘗有次雪公血藤歌云仙翁煉丹山之
之釐丹成上昇騎赤龍崖頭瑤草染餘液化爲龍種雲
重重靈根固結歷年歲鍊就冰骨堅青銅泔泔滴血試
不竭要將本領摧肝鋒比似楊左諸大老盤根錯節真
英雄丈夫自來重血性披靡肯與凡卉同我誦佳篇爲
嘆息商聲一和天西風激昂悲憤亦是一腔熱血灑出
此藤出吾鄉丹崖山中形質瘦勁以刀割之輒有汁流
出如血久之凝成琥珀色亦異產也

何宏仁

宏仁字仲淵山陰人崇正丁丑進士歷知建平

高安擢御史

康熙己亥紹興府志 宏仁官拜御史諫章數萬言切
中機宜惜不竟用流冠乘 宏仁徒跣號呼白峯嶺作
有心吟投崖絕而復甦又入陶介山叢谷中問道走縉
雲孝烏諸山與李祕霞郭蓬往來歌哭人莫測其誰何
也

倪仁禎

仁禎字心開浦江人崇正丁丑進士授太常博士擢禮科給事中奉命封藩廣西歸值國變遂
家居有問夜草

金華詩錄

給諫詩不傳浦陽陳秀才松齡於嫺嚴家

得故扇係給諫所書舊作七里瀨詩一首書法倣米海
嶽亦精

來集之

集之字元成號倘湖蕭山人崇正庚辰進士除
安慶推官擢兵部主事

菊坡詩話

吾蕭來氏邑之望族代有聞人其胸之卷

軸著述可觀者馬湖之外莫如倘湖詩非所長然如贈
吳半璧云養鶴栽松共幾年故人茆屋萬峯前只應谷
口移雲住滿洞桃花隔釣船雖淺近語猶不失唐人矩

獲

李公柱

公柱初名松晚更今名字子喬嘉善人崇正庚辰進士歙縣令

靜志居詩話 子喬旣遂初衣其詩澹蕩足釋煩憂假令吳清翁見之定當贈羅一縑餉墨五笏

吳之器

之器字賜如義烏人崇正壬午舉人有元暢樓稿

金華徵獻畧 賜如所著藝書之外曰藝書別錄明月

齋詩經春秋測史推古今句圖雜錄官方宮鐘秋窗雜
鈔物記禮叢閣鑑香草編露香采香雜題後展譜石因
八鈔藝苑指歸四種古今詩六十四家古詩廣雅樂府
翼南塘詩細填詞彖錄明月齋後刻稿曰秋聲離薳橘
服登蘋綺雲大樽溪南經鋤尊拙聽雪白醉古今宮意
閨意春問三賦之器諳知當世治亂得失之故因挾
策遊南京在公卿間數陳軍國大計言往往多中當路
交推之或有惡而尼之乃嘆曰管幼安鄭康成何人哉
吾何爲於此因賦詩云峇峇泰山桐製爲綠綺琴微以
闌河玉絃以朱絲繩清夜閒撫之殊音肅泠泠一終舞

雲鶴再變貫秋旻鍾曠久已往此曲誰爲聽

金華詩錄

吳之文秋日集
抱甕園詩註

賜如句云遙分澗瀑翻歌

雪靜卷林香入佩蘭頗有幽致出句更於抱甕有情

朱一是

一是字近修海寧人崇正壬午舉人有爲可堂

集

明時綜 陸冰修云近修古今詩不事矜鍊而詞采斐然五言如十暑杜陵葛一寒范叔袍秋懸遊子夢日落異鄉山野火燒山近寒星照水明山容初過雨水氣忽生秋淚以傷時盡愁須醉日多僧厨三度臘客夢一歸

鄉翦竹開深逕因溪架小橋青山寒照日黃葉晚從風
遠水通溝濁濃陰接樹平妻子他鄉淚文章浩劫灰七
言如救馬官同張萬歲進賢賞並鄂千秋關河秋色三
千里風雨冬青十二陵代北重關飛白雁京西古鎮出
黃花笛裏羌歌憐折柳馬頭關樹但生榆長江險失韓
擒虎胥井春埋張麗華三楚烽塵新幕府六朝烟雨舊
樓臺瀑布秋風搖練影石梁新雨糝滕花皆音響清鏘
猶是歷下四溟敵手張白方云近修東南俊傑詩派亦
足領袖後來若過淮陰釣臺作云功成百戰歸真主計
失三齊乞假王擲地有聲不作懦響

張煌言

煌言字元著號蒼水鄞人崇正壬午舉人官至東閣大學士兼兵部尚書乾隆四十三年追諡忠烈

柳亭詩話 張元著先生遁跡海隅十九年後殉節杭州幕友羅自牧侍童楊貫死之所著詩文間有一二留傳人世有曰何事孤臣竟息機魯戈不復挽斜暉到來晚節慚松柏此去春風笑薜薇雙鬢難容五嶽住一帆仍向十洲歸疊山遲死文山早青史他年任是非元人謂文山遇便卽逃疊山有髮卽剃先生落句蓋寓意焉

魏壁

璧字楚白慈溪人崇正中補歸安縣學生後更名耕字白衣有息賢堂前後集

明詩綜 蔣馭閑云魏子游意篇幅之外洋然自得不以煩簡爲度朱伯虎云楚白五古初摹漢魏至其得手則在景純遊仙支遁讚佛遊行晉宋之間若五律純祖少陵離奇天矯難以準繩相格徐楨起云楚白詩得力於漢魏而沈酣於杜李二家周青士云白衣銳意學杜晚一變而神遊於謫仙之門遂升其堂奧

王玉書

王書字永功一字無界鄞縣人崇正時諸生

見聞隨錄 無界赴省試不利適江上師起在錢忠介公肅樂幕府薦拜太常博士次年師潰匿跡晦聲絕意自放務搜剔前濯爲詩一語偶合古人爲恥而語句艱曲讀者往往齧口轉益自喜年七十卒李景堂銘其墓曰詩自漢人及唐末各宣其情音自別後來詩家顯相竊賀哭餽貽用一切寫樂不驩哀不咽先生掃之自憂憂片言隨人便不屑采石得髓抱冰骨

李奎

奎字伯文錢塘人以布政司吏再考錦衣從事

有珠山集

明詩綜 彭子殷云珠山詩一以興象爲宗篇多渾融
句多藻緻讀之爽氣滿前

戴冠

冠字我仲一名易字南枝山陰人有初臺詩集
菊坡詩話 南枝釣臺懷古詩其領聯云遠攜仙女全
家隱深悔羊裘出澤行對卽當年若只披蓑去烟水茫
茫何處尋之意出句知未經人道且人多不解其謂蓋
子陵爲梅子真之壻人傳子真仙去故云

朱扉

扉字開仲嘉興布衣

明時綜 開仲弱齡多病終其身不婚獨處深村破甑
勞薪手自執爨間賦小詩不輕示人簡吳生一律與會
自如詩云自誦梅花人日詩五旬不見但相思一春多
雨愁無夢二月輸官定賣絲行藥橋邊逢客返著書窗
下少人知近傳孺子司邨社想見麕豪割肉時

吳 郡

郡字公治石門人

石門縣志 公治博聞強記下筆千言年十九舉於鄉
授洪雅令改榮昌民安政舉以忤中貴去官嗜歌詩倘

徻西湖山水品題幾徧入爰山社汎艇乘月翛然獨往
有學步吟爰山社草

徐宏澤

宏澤字春門嘉興人

浙江通志 春門所居當闌闌拂衣淡宕爲詩類元白
畫出入子久仲圭丹陽句曲間書法從吳興而尤愛張
伯雨時稱春門三絕晚登峩眉絕頂得山水之助歸而
益工詩畫自號竹浪老人子栢齡孝廉亦善詩畫爲黃
道周所重

龐太初

太初字上古歸安人

歸安縣志 上古萬歷末年居菱湖詩才清妙與王穉
登陳繼儒爲逸友嘗遊五岳徧歷九邊所過輒留題咏
著岳陽山人集行世

董斯張

斯張字遐周烏程人有靜嘯齋集

靜志居詩話 遐周洽聞周見嘗以所作投太守吳季
駒季駒寓書韓求仲云在郡二年不識有董生吳興守
眼可挾也近得其詩如飛天仙人不着一烟火字其傾
倒若是

吳夢暘

夢暘字允兆歸安人有射堂詩鈔

射堂詩鈔序

允兆性強直不避權貴薄遊長安與宋

西寧張聖標爲文酒之交好吟詩詩不就竟夜不交睫
苦思刻鏤必得當而後已

徐偉章

偉章字漢文杭人

杭州府志

漢文隱於闔閭而興寄蕭逸好吟詩其過

禪房作云禪林幽且深門逕罕人跡烟浮竹几淡日映
松窗碧活魚鑿方池眠鹿近奇石偶來塵俗披坐久懷

抱適何必叩三車虛中自生益又梅花詩有冰霜瘦骨
嫌春草泉石幽情耐歲寒之句倪文正元璐爲序其詩
傳世

吳之文

之文婺州人

金華詩錄 吳氏所居曰大元去縣城東十五里有元
圃八景曰一溪春水雙桂秋月正峯香霧龍門白雲鏡
潭泉琴古寺鐘聲園林雅趣南樓抱翠叔簡皆有詩一
溪春水云流波曙瀉層巒瀑急雨寒搖掉尾鯨雙桂秋
月云憐香不斷遊人履就飲能消渴酒盃正峯香霧云

元豹潛隨松嶺日飛鴛亂墮半溪風龍門白雲云出岫
去來浮月鬼垂天隱見綴霜花此數聯俱有氣概

朱用調

用調字子彛山陰人有固亭遺稿

靜志居詩話 子彛五律原本襄陽太白故以跌宕見
長誦之如食哀家梨但覺甘脆七言如古祠老樹寒鴉
集官路斜陽牧馬還亦名句也

國朝兩浙詩鈔 朱子彛有江南曲云蓮葉南塘岸
燕官路齊相逢弄珠客舊識浣紗溪子夜歌初變牆頭
烏欲啼莫愁何處任言訪石城西

夏古丹

古丹不知何許人或云越人胡姓析姓爲名往來吳興埭山卒葬隆興橋有葫蘆藏稿

靜志居詩話 古丹與吾鄉吳興孫可黃項上舍子毗結契是亦湖海之士詩如春風明月動柳色上吳船晴雲一束山腰白秋色無多樹杪紅非下里音也

湖錄 古丹遊地吾邑之埭山有張廷賓者不知何許人與古丹遊處古丹有詩輒錄之山齋懸一葫蘆紙盈幅卽投其中古丹歿葫蘆適滿爰繕寫成帙系以輓詩五章題曰葫蘆藏稿

按古丹有春草詩云王孫歸路不分明愁積天涯別處生怪底女牆遮不斷春風吹上越王城或云越人疑因此詩

周於德

於德字汝修湯溪人有野處集

金華詩錄 汝修事無所考郡志但於例貢條下書姓名注云雲和訓導其家傳則云萬歷中以貢生選授詩粹傳畧但云邑文學幼穎悟長益力學以詞賦擅譽一時不言其仕按詩粹成於節推阮公阮於崇正元年任去萬歷未遠不應有悞當俟再考答姪詩評讀野處集無一語及雲和亦無一語不合處士秋日詩懷云無官

喜身輕憶昔百韻云七尺殘形骸十年浪昏旭落落名
不成孜孜力空劬相期監前車慎勿迷當局敝屣棄如
遺良玉韞諸匱迄今三紀餘老成一無束身委造化遊
書課兒孫讀茆茨艷丹楹芒屨代朱轂梅隴邀坡仙草
窗吟茂叔逢山謝履登遇酒陶巾漉簞瓢顏氏居三萬
剡侯軸時尋康節窩或訪君平卜詩向短檠刪藥藉長
鑱劇門有問奇人庭無堆案牘抱琴蘿月明解帶松風
謾散髮卧羲皇洗耳忘榮辱其自叙一生行藏顯然此
篇答姪之作尤爲確證何必以一官爲汝修榮哉遠意
高致見諸詩者雅韻泠泠已足超出流輩謙之姪勸余

求仕次復烟霞從古癖閒人野處逍遙獨抱真垂翅媿
非冲漢翻回頭肯作暴鰓鱗逢人捫虱談當世染翰雕
龍振後塵萬軸牙籤三尺劍林泉雅亦有經綸

張志遠

志遠字叔明嘉興人有竹嶼吟稿

靜志居詩話 叔明隱於市廛詩爲李九疑太僕所賞
句如沙崩樵徑斷水闊野橋危香吹新竹粉翠惜小荷
錢太僕稱其清淳穩順不誣也

杜維熙

維熙字子光東陽人有悔言集

金華詩錄 見山詩皆自寫其證悟及用功非以詩爲詩也今錄二首於前良知可知其證悟所得於後自信可知其用功究竟亦足以知其概矣

沈瑞徵

瑞徵字靈繹海寧人縣學生有慧居遺稿

靜志居詩話 沈瑞徵字靈繹海寧人有慧居遺稿五言如落水悲秋氣浮雲起夕陽雁聲春半少寒色雨中多野犬迎人吠流鶯隔樹聞雪鷗輕片片烟樹遠冥冥竹翠侵衣濕峯陰入戶涼高者近大歷十子下亦不失爲四皇甫也惜乎未四十而歿

范路

路字遵甫蘭溪人布衣流寓嘉興門人私諡曰貞簡先生有集

金華詩錄 周青士云遵甫潛心性命之學不關佛氏偶然作云青青江岸山活活江流水夫豈不高深有象終必毀又云我嘗夜分坐仰天見北斗風吹百草頭月出萬山口牧雲和尚愛之欲付以巾拂不受其詩不費鍛鍊而出誦之妍雅和平晚開靈蘭館賣藥長水市乍愚乍智人莫測其所至

明詩綜 錢爾澐云遵甫遭亂賦詩云東去入海一千

里赤脚踏着珊瑚枝足稱警局

殷仲春

仲春字方叔秀水人有棲老堂集

靜志居詩話 方叔躬耕永樂南邨陳仲醇贈詩云却羨白頭殷處士鵲鵲聲裏獨耕田是也家居社南諸弟分處郭西之竹橋方叔葭牆茆屋不蔽風雪慕王績爲人亦自號東臯子以醫爲業

葉而栗

而栗永嘉人諸生

溫州府志 葉而栗永嘉庠生負氣節闖賊陷京師失

志佯狂以語言抵觸有司繫獄會端陽賦詩有未吞蒲
酒心先醉弗浴蘭湯骨已香之句仰藥而卒

朱大典

金華詩錄 大典在官有保障功而言官毛舉細故見
諸彈章詔削籍候勘已而京師陷有白其誣於福王者
召用之未幾福王擒潞王亦降乃還鄉郡據城守城破
闔門死之著述無所見有傳其題壁詩一首者不能全
又浦江張君正以諸生殉義見明史朱大典傳中

朱士稚

士稚字伯虎更字朗詣山陰人門人私謚曰貞

毅先生有集

靜志居詩話

山陰二朗具郭景純雋上之才仗劉越

石清剛之氣會假以年直可凌顏鑠謝陳卧子詩云越國山川起霸才二子咸以管樂自命誦朗詣讀史詩云英雄窮賤盡無策天下侯王自有時慨當以慷不啻擊缺壺口也

國朝兩浙詩鈔

朱朗詣與同邑某稱山陰二朗二子

嘗以管樂自命陳卧子詩越國山川出霸才蓋謂此卒門人私謚貞毅先生有臘月詩云今年臘月歸未得獨在烏程縣可憐隔岸橫飛西塞雁前門數纜下江船高

城哀柝兵戈側短步單衣雨雪邊笑語逢迎隨契託故園何處淚潸然

陳 梁

梁字則梁海鹽人有莧園集

靜志居詩話 則梁好讀異書索異解與董思白交不效其書與鄒臣虎交不效其畫詩文詞必己出寧晦無庸晚歲隱居僧服茹葷治生壙於郭外結屋三楹覆之語其友曰此毫社遺意也題其柱云此佛自來耽米汁至今孤冢有梅花又云天下何思何慮老僧不見不聞暇輒召客縱飲壙前亦達士也

國朝兩浙詩鈔 莧園集有壽王叟一詩云竹隱居士
不入市子易一編三截葦顛毛下垂不復理於埒有雞
牢有豕牀頭有酒清且旨對竹銜杯聊自喜田舍翁願
已足矣人生大都百年耳叟今四百四十幾甲子壯夫
之顏小兒齒南宮注名從此始

朱茂暉

茂暉字子若秀水人以蔭補中書科中書舍人
有晦在先生集

明詩綜 陳則梁云子若詩不棘不舒有節有度金龍
友云先生近體不屑猶人故間作硬語澀體長歌亦然

五古典核讀之恆苦其盡

國朝兩浙詩鈔 子若爲詩最惡勦襲時賢如歷下琅
琊公安竟陵皆不屑祖附而昌黎眉山之席直欲踞之
集中有哭譚禮部元孩詩云去日乘槎易歸愁度嶺艱
河山成死別兒女望生還劍氣沈三島文星隕百蠻旅
覓招不得何處望鄉關

朱茂曙

茂曙字子衡秀水人

明詩綜 周青士云牽牛花日出卽萎晏起者不及覩
也朱子蘅茂曙有一絕云金飈初動露華滋最愛娟娟

竹尾垂多少紅樓昏夢裏不知秋色到踈籬結句寫出
花神在風露中可謂絕唱

歸允素

允素字幼美會稽人承父大順蔭官鳳陽通判
有澤農吟

明詩綜 幼美體弱然無塵坌之氣符籬懷古一篇惜
不令淳熙諸君子見之符籬懷古云張都護殺曲端關
中將士皆心寒秦丞相殺岳飛萬里長城一旦隳婁室
歡顏兀木喜小朝廷復何恃長脚太師吾何尤魏公九
泉知悔不

俞古章

古章富陽人

客座新聞 富陽俞克明既宦而貧家有田與他塍相連每歲令人侵其畔鄉民苦之其族人俞者章者賦詩一絕云一年一寸苦相侵一尺原來十度春若使百年侵一丈世間那得萬年人

王翹

翹字介人嘉興人布衣有秋槐集

靜志居詩話 介人初擅詞曲後研聲詩志取多師不遺僞體其論於合處見離離處見合啟禎之間大雅不

作毅然以起衰自任而知者寥寥惟平湖陸職方嗣端
心賞之嘗訪君於長水值君洗硯河頭挾之登舟家人
不知也徧遊苕雪乃返旣而入越謁陳推官卧子方置
酒送客君詩有前路夕陽外行人青草中之句卧子擊
節曰此今之高三十五也爲叙其詩詞遭亂所居不戒
於火惟餘小屋二間一供婦爨一吟咏其中有故人官
府寮者造之不見尋卒於京口五言如江湖長至日風
雪上方山驛路通秦遠峯陰入晉多桄榔千樹雨瘴霧
百蠻天日氣滛秋雨嵐光變夕曛楓林依水盡雲物近
秋多一二故人在飄零佳信稀江山雄白下人物近黃

初山雪行人少江梅臘月多文章身後事邱隴夢中山
白社違人日元關閉子雲江山開一望吳越在孤舟七
言如夜月旌旗五馬渡秋風草木八公山周道秋風行
黍稷漢宮春雨長蒲桃西蜀喻通司馬劔中山謗滿樂
羊書秦塞忽驚三月火漢家空待二師功三月晴風高
戰鼓九江春水下樓船鑄語高華此方虛谷所云律髓
也

見聞隨錄 翊入越謁推官陳卧子卧子方餞客座上
各賦詩有前路夕陽外行人春草中句卧子嘖嘖曰此
今之高達夫也亂後不戒於火所居止老屋數椽種牽

牛於庭曉露時碧翠娛目日課數詩旁精詞曲有紅情
言榴中怨詞苑春秋博浪沙傳奇行世尋卒於京口
浙江通志 介人日以吟哦爲樂有春槐秋槐二集里
中諸子更唱迭和因有梅里派之稱詩餘三千餘首長
短諸體莫不備

胡日章

日章字樂素海鹽人

海鹽縣圖經 胡日章澉所人少學祿命術遇異人海
上授之訣因益精每作絕句判人一生事無不驗蓋有
道而隱於術者年九十餘卒其判虞氏女命云只愁水

涸春歸早香冷簾籠淡月黃後適董湄兩月而湄死以
節終判沈氏命云年年空佩宜男草不見金盆浴鳳雛
竟無子杭州一人問命判云自是豪華多樂事元宵燈
下蹴鞦韆果於明年元夕止妻觀燈不從相毆縊死嘉
興一人生二子戲水邊同日溺死其妻痛切亦自縊夫
檢所批命帖有一雙紫燕入池塘紅粉佳人繞畫梁之
句如是者甚多

按日章又有判海昌人命帖云只恐明年五月五枯
竹叢中苦又苦果以是日乘驢過山嶺隨刺竹枝而死
見稿李詩繫

胡 禎

禎字用良新昌人

紹興府志 禎甘貧慕古絕跡城市士大夫聞其名或
造廬而見之結草廬於宅外發古今圖籍終日吟誦其
中不慕仕進所著草亭愚辨諸書古淡平實有關世教
與浦江莊景嘉禾呂原以詩文相友善景嘗寄以詩云
聖主狂奴自古容溪山此意便無窮誰知宇宙千年病
我與先生一樣風越水以東惟剡曲子陵而下幾漁翁
閒忙莫問今誰是時止時行道只同其見許如此

張良臣

良臣字武子一字漢卿家洪州父避地來鄞遂

家於此官監左藏庫

甬上耆舊詩 良臣詩高潔清厲能擺落凡俗音節磊落讀之悲壯尤長於唐人絕句語盡而意益遠論者爲詩至盛唐極矣杜牧之李商隱晚出以絕句爲專門至宋王安石力倣之然終不能似黃庭堅以造句爲工律呂乖忤而詩益變陳與義多援古語不牽引事物似黃而益奇詩之變無餘蘊矣風雅道衰獨先生徹幽向明復唐聲律一時江南詩家共推爲過江詩祖

高元之

元之字端叔勤人

甬上耆舊詩 端叔嘗作變離騷九篇曰愍畸志曰臣
薄才曰惜來日曰感回波曰力激曰危衷曰悲嬋娟曰
古誦曰繹思行於世宋人擬騷俱莫能及也

徐菊潭

名未詳杭人

豆棚閒話 吾鄉先輩詩人徐菊潭有豆棚吟一冊其
所咏古風律絕諸篇俱宇宙古今奇情快事久矣膾炙
人口惜乎人遐世遠湮沒無傳至今高人韻士每到秋
風豆熟之際誦其一二聯句令人神往余不嗜作詩乃
檢事可堪解頤者偶列數則以補豆棚之意仍以菊潭

詩一首弁之詩曰閒著西邊一草堂熱天無地可乘涼
池塘六月由來淺林木三年未得長栽得豆苗堪作蔭
勝於亭榭反生香晚風約有西南叟劇對蟬聲話夕陽
文藻按豆棚閒話乃小說家寓風世者其書不署作者姓名但自稱聖水艾納居士聖水卽聖湖亦卽西湖也艾納爲西湖人則其稱徐菊潭爲吾鄉先輩詩人知爲杭人矣

江元祚

元祚字邦玉錢塘人

樊榭山房集 明江元祚邦玉築橫山草堂攜家隱焉
有驢名曰梭翠除夕山居詩云靜隱空山無箇事祇憐
溪水一年忙高致可想也

馮淮

淮黃巖人

三台詩話 馮翁名淮號馬二子黃巖人有詩稱塞馬
先生嘗於夔州壁間題一詩云夜夢何奇特龍飛天漢
津朝橫滄海曲夕過滇池濱光霏皆五色蜿蜒無損鱗
淵田變化間張主藉高旻見補錫匠卽剷去蜀中蛾眉
亭詩一箇忠臣九族殃全身遠害亦天常夷齊死後君
臣薄力爲君王固首陽亦翁作

附論明代兩浙詩人

詩談 青田劉伯溫釣天廣樂聲容不凡開國宗工不

在茲乎獨元季之作詞多感慨姑蘇高啟岱峯雄秀瀚
海渾涵海內詩宗豈惟吳下楊基天機雲錦自然美麗
獨時纖巧不及高之冲雅潯陽張羽吳興徐賁亞矣四
傑叙稱以其才乎金華胡翰雄壯蘇伯衡豐腴太牢之
味與藜藿自別宋景濂王子充詩亦純美雅以文名山
陰錢宰霜曉鯨音自然洪亮後馬貫王誼毛鉉張燦嗣
後高摩俱清健山陰唐肅謝京驂騶驪駉並馳藝苑唐
有子之淳克繼其躅會稽劉溟溟子績績子師邵金章
紫綬祖孫相傳三世名家嘉禾鮑恂大雅君子貝瓊豪
邁之士陳秀民陳緝周致堯貝勦俱吾鄉先哲不及二

子亦稱名家吳興王蒙詩畫兩絕不忝文敏外孫沈夢
麟亦清雅海昌胡虛豪邁一鷗橫秋百鳥戢翼錢塘錢
惟善鍾湖山之秀而發於詩故多秀句瞿宗吉組織工
麗其溫飛卿之流乎但新聲與雅樂恐難並奏也後王
希範清雅惜氣不足耳嗣後吳吉甫醇雅姚綬亦清逸
黃巖許廷慎天台雁宕雄據東南小杜之稱豈容多讓
寧海方希直文章大家詩亦豪壯非所長也若黃巖方
行寧海許繼皆鐵中錚錚者前天台王澤天厨之珍自
然適口後謝鐸剛毅英華焉用藻飾四明張楷和唐音
所謂服堯之服斯堯已矣惜其自作殊不快意餘姚楊

時秀亦和唐音然有風致國初有桂彥良清雅後張培
高古嘉禾周鼎及李孟昭姚綸陳昌陳顥李孟璿季衡
吳興邱吉及唐庠唐廣張子靜海昌蘇平蘇正皆一時
名家也呂黨雅有思致海鹽張靖之寧高雅清俊得唐
調長河李東陳大韶一奏俗樂皆廢中興宗匠邈焉寡
儔獨擬古樂府乃楊鐵崖之史斷此體出而古樂府之
意微矣

全浙詩話卷三十六終